

陸放翁全集

劍南詩稿

冊
十

卷之三

劍南詩稿目錄
卷第四十九

自嘲 解嘲 野興 枕上 遠遊 晚遊
夜坐 酒熟醉中作短歌 冬夜讀書有感

散步湖上至野人家 對食戲詠 昨非 遂
初 小雨偶出隣里小兒競隨吾後不知其意

何也 書喜 書房雜書二首 寒夕 讀經
讀史 讀劉蕡策 雨霰作雪不成大風散雲

月色皎然 中夜苦寒 示子孫二首 早梅
縱筆二首 歲莫雜感四首 自責 懷舊

用昔人蜀道詩韻 出遊 辛酉冬至 冬至
後一日書 客至 子聿入城 降魔 冬日

二首 客去 自勉四首 午晴至園中 七
姪歲莫同諸孫來過偶得長句 苦寒 閨中

書適二首 復湖 梅花絕句四首 跋馮氏
蘭亭二首 十二月二日夜夢與客竝馬行黃

河上憩於古驛二首

倚樓

讀書

讀史

閒遊

日莫

省事

雪中作

夢韓无咎王

季夷諸公

晴窗讀書自勉

冬夜讀史有感

大寒

自詠

晚興

雪後寒甚

雪晴步

至舍傍

訪隱者

村野

初夜

雙松

兀

兀

殘曆

戒言

聞松風有感

遣興二首

有道流過門留與之語頗異口占贈之 閒

記老境二首

小飲梅花下作

門外野望

自題傳神

歲莫貧甚戲書

晚晴閒步隣曲

間有賦

誦書示子聿二首

十二月二十九

日夜半雨雪作披衣起聽

辛酉除夕

除夕

劍南詩稿卷第四十九

宋 陸 游 務觀

自嘲

僻學論交少貧居卜地偏不逢方謝事垂老旋希僊
兀兀醒如醉昏昏晝亦眠却慚農與圃一飽錢餘年
解嘲

一壑棲遲久多生習氣消行藏無愧怍夢覺兩逍遙
倩鶴傳山信疏泉洗藥苗晚來幽興極乘月過溪橋
野興

晨炊畚粟薦園蔬默計生涯已有餘舉世方誇稽古
力滿懷空貯活人書悶呼赤腳行沽酒出遣蒼頭旋
僦驢不爲歸休習疎嬾愛閑元與市朝疎

枕上

送盡小窗月數殘孤戍更清詩時自至幽夢久方成

衣杵斷還續燈花落復生細衾贖得暖紙帳不知明

遠遊

老子平生喜遠遊流塵不惜聞貂裘江亭吹笛三巴夜
闌路騎驢二華秋但使澄心同止水自知幻境等浮漚
悠然飽聽松風睡勾漏丹砂底用求

晚遊

垣屋參差出溝溪曲折通亂鶩空際黑落日竹間紅
軋軋輿竿語搖搖旛腳風吾行本無定隨意入空濛

夜坐

流落知聞絕歸休寵辱空酒狂寧限老詩思正須窮
活火生新焰殘燈委碎紅平生會心處正在兀然中
酒熟醉中作短歌

陸子壯已窮百計不救口蜀道如上天十年厭奔走
還鄉困猶昨負郭無百畝雖云飢欲死亦未喪所守
虛名一畫餅陳迹幾芻狗但思從壯士大獵雲夢藪
長戈白如霜爛漫載牛酒箭穿乳虎立車麟蒼兕吼

歸來數禽獲毛血灑戶牖人生貴適意富貴安可苟
冬夜讀書有感

落葉殘蕪又一冬老人光景易忽忽不論病惰耕桑
業但恨貧分學問功馬昔騰驥離冀北鶴今憔悴返
遼東六經未與秦灰冷尚付餘年斷簡中

散步湖上至野人家

湖上霜高水落時一藤信步出尋詩妄誇强健真堪
笑喚作清閑亦自欺西垓又隨牛迹去東村常望鶴
巢知漁翁留客頻辭謝雞瘦難烹酒味漓

對食戲詠

瘦榼傾桑落毫杯點雨前冰梨頗似頰霜栗大如拳
洗脯烹蔬甲攜鉏斷筍鞭餘年只此是切勿念腥羶
昨非

溫飽從來與道違書生只合臥牛衣老狐五百生前
錯孤鶴三千歲後歸舌自生肥勝玉食腰常忘帶沉
金圍一官彭澤曾何有元亮還家悔昨非

遂初

貧士善用短屏居常自如出尋鄰叟語歸讀古人書
過店亦沽酒登山時跨驢非關傲塵世聊欲遂吾初
小雨偶出隣里小兒競隨吾後不知其意何也
雲生海濫初飛雨日漏山椒旋作晴箬笠芒鞋橋下
路兒童爭逐放翁行

書喜

堪笑龜堂老更頑天教白髮看青山家居禹廟蘭亭
路詩在林逋魏野間略計未嘗三日醒細推猶得半
生閑今年況展南湖面朝借樵風莫可還時方有朝命

復鏡湖

書房雜書

歛版一何久懸車已後時狂醒醒始悔窮獨老方知
世外乾坤大林間日月遲猶須采藥去不媿鹿門期

又

面槁髮鬢髻衰殘百不能夜房侵戶月晨硯滿池冰

藥債多於酒蔬餐薄過僧年深拄杖折自斫澗邊藤
寒夕

夜扣銅壺徹旦吟了無人會此時心燈殘焰作孤螢
小火冷灰如積雪深風急江天無過雁月明庭戶有
疎碁此身畢竟歸何許但憶藏舟黃蘗林

讀經

半升粟飯養殘軀晨起衣冠讀典謨莫謂此生無用
處一身自是一唐虞

讀史

民間斗米兩三錢萬里耕桑罷戍邊常使屏風寫無
逸應無烽火照甘泉

讀劉蕡策

志士仁人一作人人氣薄雲唐家惟有一劉蕡看渠
放逐蛇龍手那肯驅蠅與拍蚊

雨霰作雪不成大風散雲月色皎然
數間茅屋寄蓬蒿天遣來歸息我勞月可一庭陳素

練風酣萬木起驚濤病侵齒髮才雖盡酒挾江山氣
尚豪安得人間掣鯨手共提筆陣法莊騷韓文公以騷
配莊古人論文所未嘗及也

中夜苦寒

困窮全素節羸老愈剛腸報國永無日飯蔬那自傷
布衾如鐵冷冬夜抵年長推枕歌梁甫中庭月似霜

示子孫

爲貧出仕退爲農二百年來世世同富貴苟求終近
禍汝曹切勿墜家風

又

吾家世守農桑業一挂朝衣卽力耕汝但從師勤學
問不須念我叱牛聲

早梅

東塢梅初動香來託意深明知在籬外行到却難尋

縱筆

晨炊躬稼米夜讀世藏書俯仰無多媿心知死有餘

又

破困供飯足陋屋著身寬小蹇勤芻秣時時一跨鞍

歲莫雜感

衰髮如枯管殘齒如敗屐取米鬻薄糜便足度晨夕
欲知死遠近不必訊龜策四序忽已過如數埃雙隻
發裝陌上亭具食水邊驛會當一日歸豈有終作客

又

天風吹雲片大者如飛鷗豈惟平溝坑直恐羶馬牛
百錢買薪蒸千錢贖褐裘雖無狐貉溫要免溝壑憂
小兒爲我言幸可具杯甌園蔬亦復佳過足翁豈求

又

歲盡霜雪稠相望僵萬木天豈私梅花獨界此芬馥
高標我自有何憾老空谷人言和羹實晚或參鼎鍊
哀哉世論卑汗我塵外躅誰能滄葑之寫真配修竹

又

我少雖嗜書賦性實慵惰初志略未訓白髮已無那

吾兒猶好勇世事如棄唾呻吟編簡中徹旦或未臥
爾來愈自勵日讀易一過勉終大學功吾道要負荷

自責

晨起登堂正幅巾蕭然聊欲養吾神凡心未免更詩
字習氣猶思議古人買屨爲登山寺去徹燈緣愛月
窗新何時一切消除盡終作無懷上古民

懷舊用昔人蜀道詩韻

曩自白帝城一馬獨入蜀晝行多水湄夜宿必山麓
時聞木客嘯常憂射工毒蜿蜒蛇兩頭蹉跎夔一足
豈惟耳目駭直恐性命促稍歷葭萌西遂出劍閣北
奴僵不敢訴馬病猶盡力我亦困人客一日帶屨束
最憶蒼溪縣送客一亭綠豆枯狐兔肥霜早柿栗熟
酒酸壓查梨妓野立土木主別意益勤我去疲已極
行行求旅店借問久乃得溪聲答歌長燈焰照影獨
村深寒更甚薪盡燒簣竹須臾風雨至終夕苦漏屋
於時厭道途自誓棄微祿猶幾三十年始謝祝史職

予四竊祠祿乃謝事君恩念篤老內閣使寓直亦思秋豪
報力憊執黍稷却尋少時書開卷有慚色

出遊

僧院軒窗酒市樓過門自入不須留恰來竹下尋棋
局又向沙邊上釣舟詩放不能諧律呂書狂猶足走
蛟虬秦碑禹窆風煙外一弔興亡萬古愁

辛酉冬至

今日日南至吾門方寂然家貧輕過節身老怯增年
鄉俗謂喫冬至飯卽添一歲畢祭皆扶拜分盤獨早眠惟
應探春夢已繞鏡湖邊

冬至後一日書

霜霰新冬後年齡大耋時功名久無夢文字略存詩
丘壘歸何憾琴書付有兒癡人癡到底更欲數期頤
客至

何處軒車客能來桑麥村一奴先入市此老自磨門
野果嘗皆澀村醅壓尚渾殘年亦何恨治世作黎元

子聿入城

小硯寒生凍孤燈翳復明衰翁守微火稚子隔重城
日落林無影舟行水有聲詩家忘艸艸得句未須成
降魔

老閱人間久曾降百萬魔悲憂誠害性喜悅亦傷和
省事常須勉忘懷得最多當年未知此無奈月明何
冬日

故里躬耕後頽齡毫及前開門無客至得句有僧傳
忽忽身如夢迢迢日似年會當乘小雪夜上剡溪船
又

客至惟清坐真貧不是慳援琴排遣悶合藥破除閑
引鶴時穿屐逢梅一破顏怪來寒徹骨夜雪冒南山
客去

相對蒲團睡味長主人與客兩相忘須臾客去主人
覺一半西窗無夕陽
自勉

妄出真成錯歸耕惜已遲褐溫貧始覺飯美淡方知
身外元無易情中自有詩窮源那得止瞑目以爲期

又

自信直如弦殘年偶得全老猶嗤佞佛貧亦諱言錢
日莫勤鞭策塵埃痛洗滌仍須語兒子此事要家傳

又

臂弱傳鈔少心煩記問衰讀書猶自力愛日似兒時
章句分無憾聲形講不遺明年幸強健閑戶有餘師

又

歸老寧常逸時時學荷鋤室雖無長物圃尚有餘蔬
壯志誠衰矣貧居亦晏如爲農當世業安用築門闥
午晴至園中

老不禁寒起每遲出門蕭散午晴時春回九地梅先
覺霜賈千林竹不知藥圃采苗芒屨溼石泉照影角
巾欹歸來未過西簷日袖手悠然獨詠詩

七姪歲莫同諸孫來過偶得長句

雨墊林宗一角巾蕭條村路竝煙津四朝遇主終身
困八世爲儒舉族貧行摘殘蔬循廢圃臥聞飢雀噪
空園封胡羯末皆佳甚剩喜團欒一笑新

苦寒

終日頻添季子裘經旬不上仲宣樓摩挲酒榼雖堪
喜疎索梅花未免愁正苦冰生退吟筆却思雪作潤
耕疇乘除擾擾殊多事獨擁青氈覓睡休

閑中書適

棋廢機心息書捐美睡多客來時淡話酒後亦高歌
甚欲江湖去無如老病何平羌半輪月依舊照漁蓑

又

乞得殘骸久天涯一禿翁瓢分春瓮綠甌絕太倉紅
短褐便冬暖長歌樂歲豐老腰那可折步步賴枯筇

復湖

世事相尋敗與成湖中畚鍤浩縱橫共知陂壞行當
復敢恨臺高旣已傾小隱山園在湖中近聞亭觀皆廢天鏡

忽看孤月墮樵風長送片帆輕下臨萬頃如雲稼從此年年有頌聲

梅花絕句

體中頗覺不能佳急就梅花一散懷衝雨涉溪君會否免教塵土宛青鞋

又

高韻知難折簡呼溪頭掃地置芳壺梅如解語應惆悵昔日名流一箇無

又

折得梅花古渡頭詩凡却恐作花羞清樽賴有平生約爛醉千場死即休

又

疎枝冷蘂誰能畫楊叟江西舊擅名今日東窗閑拂拭去人一尺眼先明

跋馮氏蘭亭

堂堂淮陰侯夫豈噲等伍放翁評此本可作蘭亭祖